

„Kerweredd“ 2020

Ihr lieve Leit un Felsegäscht,
Ich will eich begrieße zum *Erschde Juli Esse* Feschd.
Ihr wisse jo all, das Johr is besonnersch,
deswee is das do heit ah e klää bissje annersch.
Was ah all bekannt is, Kerb is kenni,
doch e Redd wollt ich halle, wenigstens e klenni.
Ich weich dodebei net arisch von de annere Johre ab,
dennoch sahn ich eich jetzt e paar Worte kurz un knapp:

Es is jo ganz klar, es muss net erklärt wern,
so e paar Gewohnheite musst e jeder e bissje ännern.
In unserm Fall betrifft das allerlei Sache,
die meischde Sitzunge konnte mer zum Beispiel net mache.
Ach **erschder** Mai un Vadderdaa, die sin gefall,
ins Wasser eninn, zum Bedauern von uns all.
Doch wanner jetzt denke, mir warn total ingeschränkt,
dann hanner awer gewaltig falsch gedenkt.
Mir sin jo eigentlich ganz annere Sitte gewohnt,
aus dem Grund hammer uns halt net komplett geschont.
Im private Kreis, do ging alsemol was,
wobei mer nadärlich ah hotte ganz schää viel Spaß.
Mol simmer gewannert, mol gabs e **Lagerfeuer**,
e anner Mol tagte mer in ner alt Scheier.
So e gewissi Geschischd is dodebei entstann,
die wer ich ah später noch parat han.

Un was mich fräht, noch kurz zu erwähne,
mer könne **heit** e paar meh Leit zu uns zähle.
Die Straußbuwe un Määd von Nerremohr
han sich vermehrt um 3 **Leit** in dem Johr.
Mir han se all wohlbewusst bei uns ingeweiht,
grad **deswee** wurden se in dere Zeit bereit
net nur in de Gemeinschaft viel Spaß zu han un zu lache,
sondern ah Kerwe-Freidaas die Eichung zu mache.

Doch weg von dem Thema, ich will net nur uf uns zulenke,
mer wolle an der Stell ah an e paar annere Sache denke.
Durch das Virus gings nämlich viele Mensche net gut,
un deshalb ziehe mer vor ganz besonnere Leit de Hut.

Vor all denne, die mer dezu zähle kann,
dass se zur Systemerhaltung beigetraa han.
Denne ihr Tate wolle mer honoriere,
uf die trinke mer heit unser Biere.

So, das wars ah schon mit meim lange Inleitungsdääl,
langsam müsst ich mo spüle mei Kehl.
Drumm sahn ich noch enns, dann bin ich soweit,
Losse eich eier Esse schmecke, ihr Leit.

Pletsch Kreisel

Die erschd Geschischd duut ufgreife e Klischee,
Mer saht jo immer, Fraue un fahre, das is net schää!
Es Geedääl beweiß ich eich in dem **donde** Fall
Do hats e waschechter Mann fast gebrung zu nem Knall.
Es is enner aus unsre eigene Reihe,
der sei Mitfahrer fast gebrung hat zum speie.

Der Straußbuu war schon zu nem ganz schääne Unfallspotential bereit
Mer hätt kenne menne, der war noch net in die Verkehrsregeln ingeweiht.
Merhat sich gefroht, bei was fer ner Fahrschul warn der in de Lehr,
er hott nämlich kä Plan vom Kreisverkehr.
Auto fahrn konnter schon, das is richtisch,
Doch im Kreisel, do warn em die Vrekehrsregeln nimmt wichtisch.
Rinngefahr isser, ohne zu gucke,
dass e Auto von links kommt, das hat ne net kenne jucke.
Wer duut ah schon blinke, wenn er rausfahre duut,
dacht sich unser Heldenbrut.
Geschehen **duut** das , allemal,
doch leider net in diesem Fall =
wars so wie er **das** hat geplant,
dass es Auto abbiet an de Ausfahrt.
Diese wollt jedoch **jener** Fahrer net nemme,
was unser Kamerad **net konnt hemme**.
Glick hotten se gehatt, durch e Vollbremsung konntten se sich rette,
dass es do kä Unfall gab, war Zufall, kännt ich wette.
Doch lerne draus wollt der besagte Buu noch net emo,
das Szenario hat sich wiederholt, das war net es letschde Mo.

Mehrmols isses faschd zu nem solche Knaller komm,
noch e paar mo hat unser Freund seine Mitfahrer de Atem genomm.
Insgesamt wär das ganze wor ziemlich deier,
Gut, dass de kundige Fahrer war unser Alkoholfreier.
Gesoff hatter net, do warer vernünftig,
hätter Hawwer gehatt, wärs geloff net so glimpflich.

Da die Musik heit net do is un net spielt,
leit ich glei üwwer zum Mundschenk seim Gebiet.

Hendrik Autoreifen

So, weiter gehts, ihr Leit, mit ner weitere Autogeschischd,
dass das, was passiert is, passiert is, das glaabt mer fast nicht.
Do hann e paar Straußbuwe gehockt am Aussichtspunkt,
un han debei so manches Bierche getrunk.
Es war e schääner Daa, die Sunn hat geschien,
un folglich is do ah ganz schää was in unser Maa eninn.
Bevor ner jetzt awer falsch denke, duun net voreilig richte,
unser Fahrer war nüchtern, das is e wahri Geschichte.
Als sich dann die Sunn hat richtung Dämmerung gedreht,
Hammer gedenkt, komm, mache mer uns mol richtung Hämweg.
Ins Auto gestie, die Motor angemacht,
glei simmer dehäm, hammer gedacht.
Rickwerts gefahr un ingelenkt,
uf ämo hat sich die Karre e bissje gesenkt.
Ach Gott, hammer gesaa, was issn **do** jetzt passiert,
das duut sich aanfühle, als ob der Rääf sei **Luft** verliert.
Do hammer schnell geguckt, un Tatsache,
Sie hat mitm Rad **ufgestann**, die Karre.
Um Himmels Wille, was mache mern jetzt mit dem Waa,
Es is jo gar kä Wechselrääf da.
De Straußvadder gesaa, im Kofferraum is enner drin,
de Fahrer voll Überzeugung, nä, das kann net sinn.
Hingehetzt un ninngeguckt,
do is jo werklich kenner, hat unser Vadder geschluckt.
Werre **vorgang** ans Auto, die Verzweiflung war groß,
Mir wurde schon unruhig, mir komme hier net los.
Der Ersatzrääf leit doch eigentlich immer **unne**, hammer uns gedacht,
nommo gucke gang, un Tatsach, war do werklich enner unnergebracht.

Dass **das** o im Normalfall is, wääs doch jeder im ganze Land,
es war halt nur unserm Fahrer net bekannt.
Un ach e Wageheber un e Drehkreuz ware dort unne drin,
mit denn Sache, hammer gemennt, kriemers hin.
Schnell wars Auto hochgepumpt un die Schraube nunner,
De Rääf wollt dann awer net ab, das hat uns gemach Kummer.
Vor allem em Fahrer, dem dem hat schnell gekocht es Blut,
weil der Drecksrääf net abgehe duut.
Ach die annere, die hat das ganz schää mitgenumm,
awer durch ufresche is jo bekanntlich nix gewunn.
Die Eltre angeruf, die hotte nadärlich kä Zeit,
jedoch die Tante vom äänd, die war sofort bereit.
Die war so gut un hat sich direkt ins Auto geschwung,
un uns e Hammer un WD40 mit enuff gebrung.
Uf de Rääf gesprüht un losgekloppt,
weiter draneträat un wie verrickt dran gerobbt.
Das schein Ding, das wurd efach net lose,
do hat echt geholf kä Tute un Blose.
Nom kurze Hoffnungsschimmer warn dann die Nerve glei widder blank,
Dass do noch e bissje Stoff do war, ei Gott sei Dank.
Kurz anne gehockt un e Biersche gezischt,
Noh ner Zeit sahn mir am Horizont nur noch e Rettungslicht.

Des Fahrers Vater, den könnt mer nochemo kontaktiere,
vielleicht duut der beim zwette Mo de Ernschd der Lage kapiere.
Beim erschde Anruf früh am Abend warer jo schon recht hilfsbereit,
Nur de Weg do nuffer, der war em efach zu weit.
Beim zwette Mol, do hatter sich dann uf de Weg gemacht,
Dass die das Teil net abkrien, das wär jo gelacht.
Uff de Fahrt do nuffer fällt em dann in,
mir kommt awei jo de richtige Weg net in de Sinn.
Sei Sohn wollt er anrufe, in seiner hilfslosen Lage,
doch üwwer de Empfang in de Reuschbach kammer nur klage.
Aus dem Grund isser häm nochemo geschwind,
zu seinem wegekundigen zwette Kind.

Zwischedurch hat sich unser Fahrer nommo beim gemellt,
während am anner Enn von de Leitung de Vatter hat geschellt.
Der arm Buu hat sich denoo sei Gedanke gemacht,
während die fsbereit Tante newetran nur hat gelacht.
Doch mir wussten, unser Hilfe is glei do,
in de Zwischenzeit hammers **selbschd** versucht, noch un nochemo.

Unser Handeln is jedoch weiter wirkungslos geblibb,
do hammer uns grad werre hingehockt un unser Biersche genippt.
So langsam wurds awer ah echt dunkel un kalt,
do hammer gar net gemerkt, dass uf emo es rettende Auto newer uns hallt.
Die Helfer sin ausgeschdie un han sich betrachdt die Lage,
Un han nur gesaa; Wie kenne dann ihr all mitenanner nur so versage.
De Babbe, de geschickte, hat sich druff e Hammer genumm,
un mit zwää, drei gezielte Schlääg de Rääf vom Auto nunner brung.
So, do hanners, was mache ner dann fer e Geschiss,
das **donde** war doch jetzt kä Katzegebiss.
Un **mir** do gehockt, vom Glaabe abgefall,
Mir han uns nur gedenkt, sahmo, hann mir e Knall?
Das Rad war war Endlich ab, do warn mer all froh,
Un e Rad ab hot jeder von uns Buwe, awer allemol!

Stefan Hörgeräte

Jetzt komm ich zu ner Person, die kenne ner all,
un was die dummes gemacht hat, wisse ner ah ball.
Ich redd von nem Mann, **do isser** höchstwahrscheinlich,
mit seiner Fraa un a zwää Töchter am Straußjugendstisch.
Dem is geschehen, e klännes Maleur,
wasm net hätt bassiere dürfe als Elektroingenieur.
Der hat sich eines Tages gedenkt, es is an de Zeit,
ich bin ganz schää verspannt, mach ich mich mol fer in die Wann bereit.
De Hahne uff un es Wasser eninn,
„Ach schää, fräh ich mich awei, wenn ich do drin bin.“
Voller Übermut un Tatendrang,
warer geween, als er is in die Badewann.
Ins warme Wasser un raus aus de Kält,
das hat ne abgelenkt von de restlichen Welt.
Un ach durch die wunderbare Seelenruh,
hatter vergess, sei Hörgeräte abzuduun.
Un dass die **Kombi** von Wasser un Elektrogerät,
dass die sich net vertraat, das wisse all Buwe un all Määd.
Deshalb isses ah so ingeträät, wie mer sich das vorstelle duut,
die besagte Hektik war in de Fall net werklich gut.
Es hat nix meh geholf, die Dinger warn hin,
was jo ah kä Wunner is, wemmer se ins Wasser mit nemmt eninn.
Die Musik däät jetzt spiele, fer dich, lieber Stefan,
mer hann se halt net, drumm kreischt de Mundschenk werre sei Lied an.

Reuschbach Zelte

Nun komm ich zu nem besonnere Kapitel von dere Redd,
weil ich net will, dass das Folgende jemand vergesse werd.
Es geht nämlich um, das merke ner glei,
um Schwachsinn un Unfugtreiberei.
Die hier anwesende Straußmääd un Buwe
solle sich mo grad es letschde Zelte ins Gedächtnis nin rufe.
Das war an Fronleichnam, in dem donde Johr,
dass das stattgefunn hat, do sorgte mir defor.
Ich will eich verspreche, es konnt sich kenner beklage,
mir han selbstverständlich gezelt unner alle Corona-Auflage.
Es war eigentlich ah alles schää, das is jedenfalls klar,
wenn do net die äänd Sach geweene war.
In zwää von vier Näch, do simmer üwwerrascht wor,
von e paar Assoziale, un das is net üwwertribb, sondern wohr.
Besuche werd uns eigentlich **jeder** kenne,
mer muss sich awer nadärlich ah benemme.
Bei unserm Zelte is das jo ah gar net unüblich,
grad mit e paar Reuschbacher hocke mer gere am Tisch.
Ob beim Zelte, wo mer se gere han in unserer Runde,
oder ah mo so, wenn se hann freundlich gewunke.

Ach dies Johr sinn e Hand voll Inwohner komm,
die hann uns awer jeden gute Glaube an das schöne Dörfche genommt.
Ufgekreuzt sinn se, do ware mer schon im Bett,
un was dann passiert is, das war gar net nett.
Es war do schon 5 Uhr mojens, de Owend war rum,
un schlofe muss mer halt ah, wenigschdens e paar Stunn.
Annerer Meinung warn die, die do dann komm sinn,
mer hat se gehört in jedem enzelne Zelt drin.
Kaum warn se do, schon wollten se schelle,
Awer halt ah newebei ihr eigeni Stimmung ufhelle.
Wo sin dann die Straußbuwe, das han se gesung,
die, dies gemerkt han, hann se zum Uffstehe brung.
Die sin dann uff, um se zu vertreiwe,
awer die Störenfriede wollten lieber bleiwe.
Un mit der Devise, Gewalt is kä Lösung,
hammers in dem Fall leider net weit brung.
Jeder Versuch, noch zu kooperiere,
wollt sich letztendlich im Nichts verliere.

Es konnt ne noch net emo enner e Wegbier anbiete,
de Vorrat steht jo bekanntlich frei fer Diebe.
Mer musst mit angucke, wie unser Alkohol schwand,
Un ach beim Esse hann se kä Gnade gekannt.
Die zwää, drei, die wach wor sinn, was sollten se mache,
üwwer **die** konnte die **Reuschbacher** nur lache.
Als se dann weg ware, do war mer dann froh,
mir han uns gedenkt, die do warn awei es letschde Mol do.
Doch von Reue war kä e Spur zu sehe,
noch net mol am Daa von de Noowehe.
E Entschuldigung zu äußern, das wollten se net kapiere,
denn das würd jo zeuge von gute Maniere.
Nä, net werklich, sie han sich kä Müh gemacht,
im Geedääl, sie kame widder in de nächste Nacht.
Mer muss nimmi erwähne, was do is bassiert,
das han ich eich nämlich schon grad ewe referiert.
Mer konnte awer von Glick redde, im Große un Ganze
hammer uns net abbringe geloss vom Spaß han un tanze.
Un deshalb kammer sahn, es is werklich wohr,
ah das Zelte war genau so schää wie die in de letschhde Johr.

Miriam Klo

Im Folgende erzähl ich eich, was passiere kann,
wenner käh Ahnung von Türe hann.
Ihr wisse jo all, wenner in Urlaub gehe,
bleibt mer ab un an mo ufm Rasthof stehe.
Mer hallt jo awer net aus Jucks un Dollerei,
do is jo schon e tieferer Sinn debei.
Was sin muss, das muss halt emol sin,
un so is **ah unser** Protagonistin ins Klohäusje rin.
Die Däär zugemach un ab uf die Brill,
schnell beeilt, weil de Mann jo net warte will.
Die Hänn gewäsch, **das** ging alles fix,
noch abgetriggelt un raus wie nix.
Die Däär wollt se uffmache, vor oder zurick,
doch beweet hat sich das Teil awer kää Stick.
„Was is dann do los, das kann doch net sin,
ich bin doch ah efach durch die Däär komm erinn.“
Gekloppt un geruf, mer kanns jo mo probiere,
de Ehemann war halt draus am telefoniere.

Drumm hat das ganze jo gar kä Wert,
wenn de Mann se drause efach net heert.
Nommo gedrickt un nommo gezoo,
es hat nix genützt, sie war immer noch im Klo.
Das Gemachs helft net, das hat se gemerkt,
do dacht se, vielleicht werd das Teil jo seitlich uffgezerrt.
Das hat se probiert, un uff ging die Däär,
„Wenn ich do nur mo frieher druffkomm wär.“
So denkt se un laaft **zurick** zu ihm **Mann**,
der froht se nur, wie mer so lang brauche kann.
Die Antwort blieb aus, die Scham war groß,
äns hat se gesaa: „Fahr efach los.“
Un ah fer dich, liebe Miriam,
sin jetzt nommo die Straußbuwe mitm singe dran.

Leonie/Hendrik/David

Am Anfang von der Krisenzeit, do wars jo **so** geween,
mit määh als zwää Leit durft mer net ausgehn.
Un ah ausfahre, das is genauso wenig gang,
nichts desto trotz hotten die Leit ihren Unternehmensdrang.
E Freundin von uns all, die hott das net in de erschde paar Daa,
die hat zum Ausgehe erschd emo nää gesaa.
Doch eines Tages, do wollt se ah mo ausm Haus,
was dann passiert is, das stellt sich glei heraus.
Als se im richtige Moment hott e Kumpel am Telefon dran,
do warer dann uf emol, de Ausgehdrang.
Komm mei Buh, schon lang nimmi gesieh,
uns emo werre zu treffe, das krie mer doch hin.
Gesagt, getan, de Treffpunkt war klar,
verabredd han se sich noch fer de selbe Daa.
Do hat se sich gefräht, un es kam rer in de Sinn,
pack ich mer noch was fer se pitsche in mei Dasch eninn.
Dumm isse jo net, das kann ich eich sahn,
vorrausschauend isse mitm Fahrrad gefahr.
Verzehlt han se viel un gebechert ah,
ratz fatz war dann ah schon de Abend da.
Es wurd allmählich spät, die Sunn is gesunk,
unn ‘s fällt dem Mädél uff, ich han enner zu viel getrunck.
Fahrn konnt se nimmi, das warer klar,
wie se hämkomme werd, wusst se, als se e Bild uf Snapchat sah.

Ach gummo do, mei Freunde sin ah on Tour,
die kennde mich doch mitnemme redour.
Angeruf un ausgemacht,
so wurd se abgeholt un hängebracht.
Doch e Sach war do noch, un zwar es Fahrrad,
das hottense nämlich net kriet ingelaad.
Dass das Teil net do leie bleiwe duut,
war der ääne Freund zum Glick so gut, =
un hat gemach kä groß Trara,
schon isser mitm Rad losgefah.
Treffpunkt is dehäm, das han se besproch,
mir warte dann kurz, mitm Rad dauerts jo noch.
Ufm Hämweg fällt dem Mädél dann in,
eigentlich müsst noch was in mei Maa eninn.
Uns als de Radler dann endlich is komm,
han se ne **mit** zum nächste Imbiss genomm.
Dann wurd de Abend noch viel, viel schöner,
zu jedermanns Freud gabs nämlich Döner.
Zu dem Anlass han se gesaa, mir fahre net zurick,
mir genieße beim Esse lieber e schöner Ausblick.
So wurd beschloss, nachdem se so han gedenkt,
un hann ihr Karre an e ganz bestimmter Platz gelenkt.
Die besagt Stell, die is jedem bekannt,
net nur Zivilischde, aah em Ordnungsamt.
Bevor se nämlich konnte es Esse genieße,
musst ne die Behörde dann de Daa vermiese.
„Das war jo klar, das musst jo so komme,
wenn ich es erschde Mol es Haus verloss, wermer hochgenomme!“
So hat das Mädél recht heftig gescholl,
un schlagartig war se ganz un gar nimmi voll.
Ganz nüchtern hat se es Gespräch ufgenomm,
doch trotz netter Worte hann se alle drei e Verwarnung bekomm.
Abgemahnt han se ihr Gedanke sortiert,
komisch war nur, es Ordnungsamt war zu viert.
Was do jetzt die Logik hinnedran war,
ihr Leit, glaawen mer, ich kanns eich net saan.

Von de liewe Beamte lossten se sich awer net necke,
später dehäm han se sich dann de Döner geloss schmecke.

Doch de letschde Kontakt mitm Staat war das nicht,
es gebt do nämlich noch e weiteri Geschicht.
Doch dodeföhr unnerbrech ich nommo die Redd,
während ich es Wort an de Mundschenk weitergebb.

Leonie Polizeikontrolle

Wie schon gesaa, worums bei dere Story gehe soll,
spielt unser Staat schon werre e Roll.
Diesmo menn ich awer net es Ordnungsamt,
die **donde** Blaumänner sin ah als die Freunde un Helfer bekannt.
Mit denne is unser Märe **in** Kontakt komm,
als die se han ausm Verkehr genomm.
Es war nohm Zelte, unser **Bier** war leer,
drumm musst de Pfand von unserm Leergut her.
So isse los mit dem Krembembel gefahr,
bis unners Dach war gelaad ihr Waa.
Von de Autobahn nunner, uf die Landstroß geboo,
schon hat sich bei rer die Mien verzoh.
Do hat nämlich e Auto gestann, in Blau un Weiß,
un das arm Maad denkt sich: Was ein Scheiß!
So wie‘s schon gemennt hat, so isses ah gang,
gewunk wurd se rechts an de Parkplatz eran.
Un als se grad parkt, do war se frustriert,
schließlich wurd se jo noch nie kontrolliert.
„Gunn Owend Herr Wachmeischder, wo leidens Problem?“ -
„Ei dürft ich mo Führerschein un Fahrzeugpapiere sehn?“
Doch net nur das Zeich, das wollt er han,
er is mit rer ah noch an de Kofferraum gang.
Do hatter gestann, un ninngestarrt,
un e Zeit lang erschd e mo gar nix gesaht.
Weiler hätt kenne menne, das Märe hat gesoff,
isses rer ganz schää kalt de Ricke runnergeloff.
Doch sahn duut er nur, „do han se awer noch was vor.“ ,
de Schreck sitzt awer heit noch, ich glaab es is wohr.

Es Wahndreieck un de Verbandskaschde, das hat se noch zeige gemisst,
wo das Zeich gelää hat, das hat se gewisst.
Denne ihr Standort warer nämlich bekannt,
weil se se rumrahme musst fer de ganze Pfand.

Dann durft se ah schon weiter fahre,
un ihr Auto endlich auslaade.

An dem Daa hat se awer net allä es Leergut choffiert,
e annerer Straußbuu hat ah noch e Kaschde transportiert.
Der hat sei Waa die selb Stroß gelenkt,
dem wurd awer die Kontroll geschenkt.
Am Parkplatz isser gemütlich entlangflaniert,
un hat die Blaumänner ganz efach passiert.
Als er dann is am Getränkemarkt ankomm,
war es Märe noch ganz schää benomm.
Nur lache konnter üwwer dere ihr Leid,
sei Grinse im Gesicht, was war das breit!
Un darer ah is in die Geschicht ingeweiht,
darf er jetzt ah kreische, ihr liewe Leit.

Thomas Wand

Mei letschdi Geschischd, die erzählt e Missglück,
das muss ich verzehle, ich konnt mich net halle zurick.
Es geht um e Mann, mer kennt ne recht gut,
der ursprünglich ah aus dem Dorf stamme duut.
Aktiv warer ah uf de Fels als Straußbuh,
do jowwe sieht mer ne heit noch, ab un zu.
Doch wohne duut er nimmi, bei uns in Nerremohr,
no Schrollbach isser gezoo, schon vor e paar Johr.
Das is awer ah de ähznigschde Unfug, den er gemach hat im Läwe,
am folgende Unglück duut er kää Schuld traan, das muss ich erwähne.
Es war an nem schääne Daa, es war e gewöhnlicher geweeh,
was er genau gemach hat, wäas ich net määh.
Jedenfalls hatter ausm Fenster geguckt, de Hügel enuff,
un uff die Häuser, die dort owwe sin, druff.
An ähm Haus sieht er noch e Transporter oder so,
e Lieferant oder e Handwerker war dort anscheinend do.
Gedenkt hatter sich nix, als er so hat gestann,
un gedauert hats net, bis er vom Fenster is gang.
Druff is dann erschdmo e bissje Zeit verstrich,
passiert is net viel, erinner ich mich.
Bis mer uf emol e Schäppern konnt häre,
e unschänes Geräusch, das härt mer net gere.

Ich kann eich nur sahn, als das passier is,
hat unser Person kriet ganz schää viel Schiss.
Raus isser gerennt, ums Haus drum erum,
was er do gesieh hat, gehau hats ne um.
Musst er sich angucke, wie in sei eigeni Wand
de Transporter gerollt is, den er von vorhin schon kannt.
Es wurd wohl vergess, die Handbrems zu ziehe,
was mer am Bersch liewer mache sollt, wie mer jo siehe.
Un e kläner Schade hat das Auto ah angerischd,
ganz ohne Macke blieb es Haus nadärlich nicht.
Doch zum Glick, kammer sahn, 's is kenner verletzt wor,
dass das annerschd ausgehe kann, das kam bestimmt schon mo vor.
Un ach fer dich, liewer Thomas, dürfe die Straußbuwe un Määd nommo ran,
ich hoff fer dich, das war de letschde **Transporter** an deiner Wand dran.

Bevor ich eich jetzt awer entlosse duu,
häärn mer bidde nommo ganz kurz zu.
Das zu saan, das werd höchste Zeit:
„Vielen Dank für euche Aufmerksamkeit.“

Doch das wars noch net, ihr müsse noch warte
enner Person will ich noch danke für ihr Tate.
Un zwar unserm Mundschenk, em liewe Hendrik,
der hat mer viel geholf mit seinem Reimgeschick.
Zusamme hammer geschrieb, die dont Kerweredd,
Dass ich die allän so gut hinkriet hätt, das glaab ich jo net.
Viel schääne Stunne, die hotte mer gehatt,
oft hammer gehockt bis tief in die Nacht.

So das wars jetzt awwer, es is ah mo gut,
ihr häre mich werre, wenn die nächschd Kerb komme duut.